

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 403779 21 St
Tuzla, 05.01.2022. godine

Općinski sud u Tuzli, sudija Ilvana Delić, u stečajnom postupku nad imovinom dužnika „**STOČAR**“ d.o.o. Gračanica, za proizvodnju, preradu i promet mesa, ul. Šenik bb, dana 09.09.2021. godine, donio je sljedeće:

R J E Š E N J E

I-OTVARA SE stečajni postupak nad imovinom dužnika „**STOČAR**“ d.o.o. Gračanica, za proizvodnju, preradu i promet mesa, ul. Šenik bb, matični broj subjekta 1-168, broj glavnog računa 3386202200009523 otvoren je kod UniCredit bank dd Sarajevo.

II-Stečajni postupak se otvara sa danom 05.01.2022. godine u 12,00 sati, kada se rješenje o otvaranju stečajnog postupka ističe na oglasnoj tabli suda. Oglas o otvaranju stečajnog postupka objavit će se u „Službenim novinama F BiH“.

III-Za stečajnog upravnika imenuje se Nedret Kikanović iz Tuzle, ul. Aleja Alije Izetbegovića 25.

IV- Nalaže se stečajnom dužniku i trećim licima da stečajnom upravniku predaju u posjed imovinu i dokumentaciju stečajnog dužnika koja je u njihovom posjedu.

V-Pozivaju se povjerioci da u roku od 30 (trideset) dana, od dana objavljivanja oglasa o otvaranju stečajnog postupka u „Službenim novinama F BiH“ prijave svoja potraživanja stečajnom sudu dostavom prijave i priloga u dva primjerka u skladu sa odredbama Zakona o stečaju prijavi potraživanja (član 105. Zakona), te prilože dokaz o uplaćenju sudskoj taksi na prijavu potraživanja u iznosu od 1% od vrijednosti potraživanja, s tim da taksa ne može biti manja od 50,00 KM, niti veća od 10.000,00 KM, na žiro račun broj 1321000256000080, vrsta prihoda 722221, primalac Budžet Tuzlanskog kantona.

VI-Pozivaju se povjerioci da u roku od 30 (trideset) dana, od dana objavljivanja oglasa o otvaranju stečajnog postupka u „Službenim novinama F BiH“ stečajnog upravnika obavijeste koja prava osiguranja potražuju na predmetima imovine stečajnog dužnika. Potrebno je navesti predmet na kome se potražuje pravo osiguranja, vrstu i razlog nastanka prava osiguranja kao i osigurano potraživanje.

VII-Pozivaju se lica koja imaju obaveze prema stečajnom dužniku da ih bez odlaganja izvrše.

VIII-Otvaranje stečajnog postupka ima se upisati u sudski registar Općinskog suda u Tuzli, zemljišne knjige Općinskog suda u Gračanici, te kod Službe za geodetske i imovinsko-pravne poslove Grada Gračanica.

IX-Skupština povjerilaca (ročište za ispitivanje) na kojem će se ispitati prijavljena potraživanja zakazuje se **za dan ČETVRTAK 10.03.2022. godine u 09,00 sati**, u zgradi Općinskog suda u Tuzli, ulica ZAVNOBIH-a bb, kancelarija 137.

X-Skupština povjerilaca (izvještajno ročište) na kome će se na osnovu izvještaja stečajnog upravnika odlučiti o daljem toku stečajnog postupka **održat će se ČETVRTAK 10.03.2022. godine**, na istom mjestu nakon ročišta za ispitivanje prijave potraživanja.

XI-Rješenje o otvaranju stečajnog postupka u cijelosti objavit će se na oglasnoj tabli suda, web-stranici suda – elektronskoj tabli suda, na internet stranici FIA-e, a u Službenim novinama F BiH objavit će se samo izreka rješenja.

O b r a z l o ž e n j e

Dana 30.06.2021. godine, predlagač „**STOČAR“ d.o.o. Gračanica, za proizvodnju, preradu i promet mesa, ul. Šenik bb**, podnio je prijedlog za otvaranje stečajnog postupka nad imovinom dužnika ovim privrednim društvom iz razloga platežne nesposobnosti., temeljem odredbe člana 4 i čl. 6. Zakona o stečaju („Sl.novine F BiH“, br.53/2021).

Nakon razmatranja prijedloga sud je rješenjem od 02.07.2021. godine pokrenuo prethodni postupak radi utvrđivanja uslova za otvaranje stečajnog postupka i imenovao privremenog stečajnog upravnika temeljem odredbe čl. 60., 61. i 63. Zakona o stečaju.

Privremeni stečajni upravnik u spis suda dostavio je izvještaj o provedenom prethodnom postupku sa nalazom i mišljenjem na okolnosti postojanja razloga za otvaranje stečajnog postupka. Temeljem odredbe čl. 102 stav 1. Zakona o stečaju zakazano je ročište radi ispitivanja uslova za otvaranje stečajnog postupka i rasprave o izvještaju privremenog stečajnog upravnika na koje je pristupio privremeni stečajni upravnik i zakonski zastupnik dužnika.

Iz izvještaja privremenog stečajnog upravnika proizilazi da je za društvo dužnika registrovano pod matičnim registarskim brojem subjekta upisa : 1-168. U pogledu pravnog statusa privremeni stečajni upravnik je utvrdio Privredno društvo „**STOČAR“ d.o.o. Gračanica, za proizvodnju, preradu i promet mesa, ul. Šenik bb**, je osnovano 22.12.1989. godine sa osnovnom djelatnošću proizvodnja, promet i prerade mesa.

Društvo je prestalo da posluje, odnosno da aktivno nastupa na tržištu, 2017. godine jer iz knjigovodstvenih evidencija kao i zaključnih listova-bruto bilansi po godinama, proizilazi gubitak koji se akumulirao sa godinama. Računi preduzeća kod poslovnih banka su ili ugašeni ili blokirani na dan pokretanja prethodnog postupka. Tokom predstečajnog postupka utvrđeno je da dužnik ne posjeduje imovinu.

U izvještaju privremenog stečajnog upravnika utvrđene su obaveze društva koje se odnose na obaveze prema Poreznoj upravi F BiH KPU Tuzla u iznosu od 48.626,37 KM, dug Upravi za indirektno oporezivanje RC Tuzla 233.077,00 KM kao i obaveze iz poslovanja u iznosu 81.412,00 KM. Realno stanje obaveza utvrdit će se u toku trajanja stečajnog postupka a nakon podnošenja prijava potraživanja povjerilaca.

Prema izjašnjenju privremenog stečajnog upravnika, društvo nema platežnu sposobnost, budući da ne izmiruje svoje obaveze u dužem vremenskom trajanju od 60 dana i da su mu računi u dužem vremenskom trajanju od 60 dana u blokadi, da nije u stanju izvršiti svoje dospjele obaveze plaćanja, te da su ispunjeni stečajni uslovi za otvaranje stečajnog postupka u smislu odredbe člana 102. stav 6. Zakon o stečaju.

Dakle, na osnovu izvedenih dokaza tokom postupka utvrđeno je da je prijedlog za pokretanje stečajnog postupka dopušten, zbog nesolventnosti i nelikvidnosti dužnika postoji stečajni razlog, a iz uplaćenih sredstava na ime finansiranja troškova prethodnog postupka od strane predlagača kao i naknadno uplaćenih sredstava za finansiranje troškova stečajnog postupka po rješenju ovog suda od 27.10.2021. godine, može se finansirati stečajni postupak. Na osnovu navedenog ispunjeni su uslovi za otvaranje stečajnog postupka nad imovinom dužnika.

Sud je temeljem odredbe čl. 102. stav 4. a u vezi sa čl. 6. Zakona o stečaju odlučio kao u izreci rješenja.

Odluku o imenovanju stečajnog upravnika, sud je donio temeljem odredbe člana 104. stav 2. tačka b. . Zakona o stečaju, a nakon što je utvrdio da isti ispunjava uslove utvrđene odredbom člana 71. Zakona o stečaju.

Sud je, odluku o određivanju ročišta za ispitivanje prijavljenih potraživanja i izvještajnog ročišta, donio temeljem člana 106 Zakona o stečaju.

Odluku o objavljivanju otvaranja stečajnog postupka, sud je donio temeljem člana 105. stav 1. Zakona o stečaju.

Temeljem odredbe člana 105. Zakona o stečaju, sud je uputio odgovarajuće pozive povjeriocima i dužnicima stečajnog dužnika.

Upis otvaranja stečajnog postupka u javne registre određen je temeljem odredbe člana 108. stav 1. tačka a. Zakona o stečaju.

STEČAJNI SUDIJA
Ilvana Delić

POUKA O PRAVNOM LIJEKU:

Protiv ovog rješenja žalbu može uložiti stečajni dužnik.

Žalba se podnosi Kantonalnom sudu u Tuzli, putem ovog suda u tri primjerka u roku od 8 dana po proteku 5 radni dana od dana objave rješenja u Sl. novinama F BiH.

Žalba iz prethodnog stava ne odlaže izvršenje rješenja.